

Luigi Bergen(MEP):

Enseñansa mester di cuida intensivo

Examen: Luna di mei y juni di cada aña tin examen y herexamen pa un alumno/estudiante cu ta finalisa su estudio secundario. E estudio por ta di scol avansa of scol profesional. Dos luna cu, lastimamente, ta tipifica su mes cu hopi tension y nervio pe alumno of estudiante.

Resultado: Informacion di Relato Estadistico di Enseñansa di Aruba ta duna nos un bon bista riba e resultado di diferente tipo di enseñansa secundario. Den e schema ad-hunto a inventarisa resultado di diferente tipo di enseñansa di aña escolar 2009/2010 pa 2013/2014. Esun di aña escolar 2014/2015 no ta disponible na momento di skirbi e articulo aki.

Clasificacion: Pa interpreta e resultado a haci uzo di un clasificacion di porcentahe cu ta wordo uza den enseñansa na Estados Unidos. E clasificacion ta di inaceptabel (0 pa 59), pover (60 pa 69), averahe (70 pa 79), bon (80 pa 89) pa excelente (90 pa 100).

Analisis: Scol EPB su clasificacion ta bon y cu tendencia positivo di bira excelente. Clasificacion di scol Tecnico

anochi tambe ta bon, pero contrario na EPB, su tendencia ta di baha den clasificacion pa averahe. MAVO su clasificacion promedio ta uno inaceptabel (48%) cu diferencia grandi entre MAVO den dia (75%) y MAVO merdia (32%) y MAVO anochi (38%). MAVO den dia ta muestra un tendencia di baha den clasificacion di averahe pa pover. HAVO mescos cu MAVO su clasificacion promedio ta inaceptabel (56%) y tambe cu diferencia grandi entre HAVO den dia (68%) y HAVO anochi (43%). HAVO den dia su clasificacion pover ta uno preocupante. EPI como unico scol profesional

intermedio su clasificacion pover di 65%, mescos cu HAVO, ta uno preocupante. Preocupante pasobra ambos tipo di enseñansa ta duna entrada na estudio superior. EPI ta muestra un tendencia cauteloso pa subi den clasificacion pa averahe. Contrario na HAVO, VWO si ta muestra un tendencia positivo pa subi den clasificacion di averahe pa bon. **Aruba:** Clasificacion general di Aruba su enseñansa secundario ta consistentemente pover (63%) cu tendencia negativo pa bira inaceptabel. Den nos idioma crioyo nos ta bisa cu esaki ta malo mes. **Conclusion:** (1) Ta conclui cu

casi 80% (7 di 9) tipo di scol secundario NO por wordo categorisa como bon. (2) Solamente 60 di cada 100 (60%) alumno/estudiante ta logra su examen cu exito. (3) Cada aña un porcentahe grandi di 40% NO ta logra pasa su examen cu exito. Pa aña escolar 2013/2014 esaki tabata un total di 730 alumno/estudiante (40% di 1826 candidato total). (4) MAVO, merdia y anochi, y HAVO anochi ta hopi malo y ta direccion pa desaster. (5) MAVO den dia ta den un spiraal negativo, caida di 15% (82% pa 67%) den apenas dos aña cu mester wordo frena inmediatamente. **Accion:** Minister di Ense-

ñansa mester tuma accion di biaha pa MAVO y HAVO. Haci un 'quick-scan' na MAVO y HAVO. A base di e informacion compila, haci algun intervencion efectivo pa sali for di e abismo pa loke ta trata resultado di examen, sigur pa loke ta trata MAVO merdia, MAVO anochi y HAVO anochi.

Inspeccion: Consejo ta pa laga Inspeccion di Enseñansa haci un investigacion di calidad profundo. Inspeccion ta traha cu diferente area di calidad. Asina lo haya sa cua area di calidad mester mas atencion.

Gobierno: Nos por constata cu enseñansa, no tabata, ni ta un prioridad pa Mike y AVP. Durante añanan di gobernacion, e resultado di scol a bay di 'mal en peor'. Minister di Enseñansa, cu ta carga responsabilidad final pa enseñansa di Aruba, mester conclui, cu a base di e resultado malo presenta, e mester retira.

Hoben: Mi ta termina pa desea cada hoben cu ta den examen exito. Enfoca riba bo rosea, contesta e pregunta di facil pa dificil pa abo, y e dia prome cu examen bay lama of bay wak cine, en todo caso haci algo pa relaha bo mes. Persevera pa Bo Futuro, Traha Duro y Efectivo. □

		porcentahe di graduado pa aña escolar					promedio di 5 aña	clasificacion
tipo di enseñansa		2009-2010	2010-2011	2011-2012	2012-2013	2013-2014		
MAVO	EPB	81%	83%	88%	84%	86%	84%	bon
	Tecnico Anochi	82%	81%	85%	88%	82%	84%	bon
	den dia	73%	78%	82%	74%	67%	75%	averahe
	merdia	50%	31%	35%	25%	21%	32%	inaceptabel
	anochi	46%	39%	40%	32%	31%	38%	inaceptabel
	den dia	58%	67%	74%	69%	70%	68%	pover
HAVO	anochi	43%	42%	51%	40%	37%	43%	inaceptabel
	EPI	60%	67%	63%	65%	71%	65%	pover
VWO		75%	66%	79%	82%	81%	77%	averahe
promedio general		63%	62%	66%	62%	61%	63%	pover

fuerce: Relato Estadistico di Enseñansa di Aruba

luigibergen